



## 80 staf baharu sertai Program Orientasi

Berita dan foto oleh: SUHANA MOHD. NOR

Lebih 80 orang staf baharu Universiti Malaysia Pahang (UMP) menyertai Program Orientasi Staf Baharu atau 'Selamat Datang Ke UMP' anjuran Bahagian Latihan dan Pengembangan Kompetensi (BLPK) yang diadakan di Dewan Tun Fatimah, UMP Kampus Gambang pada 29 September 2015 yang lalu.

Program dikendalikan oleh penceramah dan fasilitator dari kalangan staf UMP sendiri meliputi pembangunan korporat, pengurusan kualiti, sumber manusia, hal-ehwal akademik, pengantarabangsaan, penyelidikan dan sebagainya.

Program bertujuan untuk memberikan input kepada staf baharu UMP berkenaan hasrat pihak pengurusan universiti terhadap peranan dan tanggungjawab yang perlu dilaksanakan bagi sama-sama menjayakan pencapaian visi dan misi UMP.

Dalam sesi sejenak bersama pengurusan universiti, Timbalan Naib Canselor (Hal Ehwal Pelajar & Alumni), Profesor Dato' Dr. Yuserrie Zainuddin berkata, kejayaan sesebuah organisasi atau universiti bukan faktor utamanya disebabkan oleh ketua jabatan tetapi disebabkan peranan dan tanggungjawab yang dimainkan oleh semua lapisan staf di UMP yang mendokong kepada budaya kerja cemerlang melalui penghasilan kerja berkualiti dan berproduktiviti tinggi.

Manakala menurut Pemangku Pendaftar, Abd. Rahman Haji Safie, sebagai staf baharu mereka perlu memahami peranan dan tanggungjawab dalam usaha merealisasikan hasrat universiti dalam mencapai visi dan misi UMP.

"Sekiranya mereka memahami dan menghayatinya maka pastinya tidak timbul

isu segelintir staf yang tidak berdisipin dan tidak berintegriti.

"Staf perlu memanfaatkan program ini yang dapat memberi ilmu dan maklumat yang peroleh berkenaan universiti.

"Selain itu juga mereka perlu menghayati konsep kerja sebagai ibadah dalam melaksanakan tugas di tempat kerja masing-masing," katanya.

Peserta program Pensyarah Fakulti Kejuruteraan Mekanikal (FKM), Dr. Ahmad Fitri Yusop berpendapat menerusi program ini kita dapat memupuk semangat bekerja dengan lebih komited kerana kita mengetahui hasrat pihak pengurusan universiti dan peranan serta tanggungjawab yang perlu dimainkan.

Begitu juga dengan Pembantu Tadbir (Perkeranian/Operasi), Institut Pengajian Siswazah (IPS), Aisyatul Hanisah Mazri berkata, mereka berpeluang mengetahui fungsi utama universiti meliputi teras akademik, hal-ehwal pelajar, penyelidikan dan sumber manusia.